

## Илм-маърифат фидойиси (учинчи мақола)



19:00 / 10.12.2021 1387

Иноятхожа устози Муҳаммад Солеҳ даргоҳларига бориб, у кишидан шариат илмлари ва тариқат одобларини ўрганиб, илму ирфонда камол топади. Муҳаммад Солеҳ ҳазратлари Иноятхожага умрининг охирига қадар пири муршид сифатида шогирд (мурид) тарбиялаш ҳамда толиби илмларга илм-маърифат улашиш вазифасини юклайди. Устози унга пиру муршид қилиш ҳуқуқини берувчи иршоднома (йўл, йўриқнома, ижоза, йўлланма) битиб беради. Бугунги кунда Муҳаммад Солеҳ битиб берган иршод Иноятхожа авлодлари хонадонида сақланмоқда.

Иноятхожа Лангарий ўз замонасининг пири муршиди, каромат соҳиби ҳамда валиюллоҳлар зумрасидан бўлган. Замондошларининг ривоят қилишларича, бир куни ҳазрат Иноятхожа гузар олдидан отда ўтиб кетаётса, баногоҳ қаршиларидан тахминан 6-8 ёшлар орасидаги бола чиқиб қолибди. Ҳазрат дарров уловларидан тушиб, тўхтабдилар. Пиёда келаётган болага яқинлашгач, салом берибдилар. У ўтиб кетгандан кейин отларига миниб, яна йўлларида давом этибдилар. Шунда ёнларидаги ҳамроҳлари, шундай улуғ зот, бир ёш болага бу қадар иззат-икром кўрсатганингиз боиси нима деб сўрашибди. Шунда ҳазрат Иноятхожа: «Бу боланинг ичида нима борлигини, ким эканлигини биласизларми?» десалар, Йўқ деб жавоб беришибди ҳамроҳлари. «Бу боланинг ичида Аллоҳнинг муқаддас каломи Қуръон турибди. Бу бола ҳофизи Қуръон. Аллоҳнинг каломи олдидан қандай қилиб шундоқ ўтиб кетаман?» дея жавоб берган экан Иноятхожа.

Юқоридаги воқеадан Иноятхожани Аллоҳнинг суюкли ва маҳбуб бандаларидан бири ҳамда юксак хулқ, каромат соҳиби ҳамда валий киши бўлганларини билиш мумкин.

1899 йилнинг 15 февраль чоршанба куни Иноятхожа Лангарий бу фоний дунёдан боқий дунёга рихлат қилдилар. У шаҳарнинг катта қабристонини Мавлавий мазорига дафн этилди. Шогирдларидан мулла Йўлдош Хилватий устози Иноятхожа вафотига атаб 40 банд (200 мисра)дан иборат «букун» радифли марсия муҳаммасини ёзган.

Бундан ташқари, устозининг илму камолоти ва фазилатига юксак баҳо бериб, «Лангарий» деб номланган радифли шеър битган. Қуйида олим вафотига атаб ёзилган марсиядан қисқача келтирамиз.

Қилди даврони фалак, ул меҳри анвордин жудо,  
Қутби олам, фаҳри гити, шоҳ сарвардин жудо,  
Луълуъи тар, даржи гавҳар, тоза гавҳардин жудо,  
Бўлдук ул иксири аъзам кимёгардин жудо,  
Ким қилур ёқути аҳмар санги хоромиз букун.

Шайхул ислом унвонига эга бўлган, бир неча юзлаб шогирдларга дарс берган Иноятхожа Лангарий охирги нафасларигача илм олиш ва зиё улашиш тараддудида бўлишлари, биз авлодларга юксак ўрнақдир.

Тадқиқотларимиздан маълум бўлишича, Лангар мавзесида катта қабристон, масжид, мадраса, хонақоҳ ва чиллахона бўлган. Бироқ, собиқ шўролар даврида 1917-1930 йиллар орасида мазкур жойлар бузилиб, ғиштлари олиб кетилган. Қабристонни бузиб, ўрнини пахтазор қилинган экан. Кейинчалик, аҳоли яшайдиган уйлар қурилиб, аҳолига участка ва томорқа қилиб бўлиб берилган. Маълумотларга кўра, ҳозирги Лангар масжиди хонақоҳига кирганда, хонақоҳнинг ўнг томони бурчак қисмининг (қибла тараф) ташқарисида эски 2 та қабр бўлган экан. Ушбу икки қабрга ўша даврнинг машҳур уламоларидан Хожа Амин Парранда ва Мавлавий Намангонийнинг отаси Мулла Ражаб охундлар дафн қилинган экан.

Биз кўп изланишлар, суриштирувлар натижасида Иноятхожа Лангарий оиласи ва фарзандлари тўғрисида ушбу маълумотларни тўплашга эришдик.

Иноят хожа Лангарий Ибодатхон ойим исмли аёл билан турмуш қурган. Ундан 2 та ўғил фарзанд кўрган.

Ўғиллари Убайдуллоҳ маҳдум (1864-1928), Тожуддин маҳдум (Тожихон исмлари билан машҳур) (1867-1955).

Убайдуллоҳ маҳдум 4та аёлга уйланган. Улардан 5 та фарзанд кўрган. Аввалги аёли Тожихон ойим. Фарзанд кўрмаган. Кейинги аёли Офтобхон

ойимдан 1та ўғил, 1та қиз фарзанди бор.

Фарзандлари Муҳаммад маҳдум (1905-1974) ва Муллахон ойим (1902-1958).

Ўртанча аёли Бахрихон ойимдан 2 та ўғил фарзанди бор. Турсун хўжа (1918-1954) ва Абдуллоҳ (1924-1978).

Охирги аёли Шамши Қамбар ойимдан 1та қиз фарзанд кўрган. Фотимахон ойим (1927-1994).

Убайдуллоҳ маҳдумнинг иккинчи аёли Офтобхон ойимдан кўрган фарзандлари Муҳаммад маҳдум ва Муллахон ойимдир.

Муҳаммад маҳдумни 2та ўғил, 1та қиз фарзанди бор.

Фарзандлари Абдурахим (1944), Абдухалим (Олимжон) (1950-2015), Илтифотхон пошша (1947).

Убайдуллоҳ маҳдум қизлари Муллахон ойим Қутбуддин маҳдум (1900-1054) мулла Жалолхон маҳдум ўғлига турмушга чиқганлар. Уларнинг 5 та ўғил 2та қиз фарзанлари бўлган.

Фарзандлари Алихон (1922-2006), Муйдинхон (1928-2014), Насриддинхон (1937-2002), Шамсиддинхон (1940), Фазлиддинхон (1946), Офтобой пошша (1925-1992), Маҳбубахон пошша (1933-1987).

Иноятхожа Лангарийнинг иккинчи ўғли Тожуддин маҳдум (мулла Тожихон исмлари билан машҳур)нинг 3 та ўғил, 1 та қиз фарзандлари бўлган.

Фарзандлари Абдулваҳҳоб (1912-1992), Абдулҳафиз (1927-1934), Абдуллатиф (1924-2008), Робияхон пошша (1928-2015). Иноятхожа Лангарий авлодлари тўғрисида тўпланган маълумотлар шулардан иборат. *(Тамом)*

[1] И.Абдуллаев. Хилватий девон. -Т.; Фан, 2001. Б.378.

[2] Ушбу маълумотлар Иноятхожа Лангарий авлодларининг шахсий архивидан олинди.

**Акрам Шарипов, мустақил тадқиқотчи,  
Чиноз тумани, Олмазор қўрғони.**

-

-

-